

Pol-ate kaapiya la vu hil bel-ate vu Epesas

1 ¹“Sa Pol sen Anutu yoo holin sa be saatu Yesu Kalisi-te sinalêê-to. Sa kaavu kaapiyaa-jo laas Epesas vu Anutu-te hil ham sen ham awii-having Yesu Kalisi keen-ato.

²“Yate Aamangg Anutu yuuuh Omaaho Bop Yesu Kalisi lambiing samu samu naas mando gaving ham-ambe ham alompayo nanjip melaas.

Anutu wiing samu samu pin vu yiil lak Kalisi

³“Yiil gako yate Omaaho Bop Yesu Kalisi Mangganaan Anutu haale jak, in yaatu Kalisi-te hil atombe Anutu wiing Vavi Vaambuung-ate samu samu pin sen neep baandonii-to laam vu yiil.

⁴“Keen, Anutu yoo holin yiil ak munggin sen me-hatung ngaanggis-ato le. Ahe having yiil om holin yiil in nambe yiil naatu Kalisi-te hil, tombe mem yiil naatu vaambuung osin yiil naatu hil sen Anutu me-ji naambe va nipaya me-neep vu yiil-ato le. ⁵“In Anutu yoo ahe having-ambe ka vu bôôy nambe le samu yiil, om néêl vulôôt nambe Yesu Kalisi le gako yiil naah vu yi, tombe mem naanêêl yiil naambe noow-aso yiil. ⁶“Om yiil gako Anutu haale jak lôôt in yite samu samu melangaah-atêêñjo, in ahe having Noow Yesu, le ma de wiing laam nyemalis amu be hôôvu yiil.

⁷“Tonde Noow-anjo ond vaanggo yiil lom vu Anutu lak yite nihees sen kaasêêh la in nambe kawiyy yate va nipaya naa-to, ond manyinjo yoo lohv Anutu-te samu samu bopaata. ⁸“Keen, wiing samu samu vu yiil-anjo bopaata lôôt de me-vu teenin e, tonde navu kakook osin navu tatekin vakasin danggakook vu yiil having. ⁹“Yoo nanêêl vakasin sen ka yoo navu hôôk lopayo bôôy-ambe neep vunin-ato langaah vu yiil. ¹⁰“Kakook vunin-anju nambe, busin sen Anutu holin-ato jung na le mem va pin vu baandoni de vu voon-ambe javuh ti be mem langgulis Kalisi baambu.

^a 1:1 Lom 1:1,7; 1Ko 1:1; Kol 1:1; Sin 18:19-21; 19:1 ^b 1:2 2Ko 1:2; Kol 1:2 ^c 1:3 Ep 2:6

^d 1:4 Jon 15:16; 17:24; 2Tes 2:13; Ep 5:27; Kol 1:22 ^e 1:5 Jon 1:12 ^f 1:6 Mat 3:17;

Kol 1:13 ^g 1:7 Ep 2:7; Kol 1:14,20 ^h 1:9 Lom 16:25 ⁱ 1:10 Gal 4:4; Kol 1:16,20

^jIn Anutu yoo nawiing va pin nalohvu ka be nôôn nalak, de yoo ka vu bôôy-ambe nêîl vulôôt nambe Kalisi le gako yiyy nom in yiyy naatu yite hil. ¹²Keen, yoo holin hey Yuda sen Kalisi me-laam e de hey oo monatung mengg in yi munggin-ato, ond holin hey in nambe omaahonôôn lanji hey, tombe mem kand bu Anutu-te nikaapulis-ambe sil gako Anutu haale jak. ¹³^kOm yik gêen ham hango vakasin keen, tombe banye nivasa-jo tatekin mopaatôôv sen Anutu gako ham naah vu yii-to vu ham, le mem ham alompayo la timu vu Kalisi, tombe mem Vavi Vaambuung sen Anutu yoo nêîl bôôy nambe le biing naam-ato, ond yik wiing laam-ambe lukala nando hôôk ham alompayo in nambe taato bulôôt naambe yite hil ham. ¹⁴^lTombe Vavi Vaambuung-anja navu taato nambe Anutu vaanggo yiyy-ambe yaatu yite hil lung la, tonde yoo le mando motaato naambêenjo lôôt-ambe na balup busin sen-ato naatok naam, le mem Anutu gako yiyy anaah mando gaving yi in nambe hil pin lanji

Anutu-te nikaapulis-ambe gako Anutu haale jak.

Pol lohak in hil Epesas

¹⁵^mKe, sa hango nambe ham awii-having Omaaho Bop Yesu, de ham ahem naving Anutu-te hil pin, ¹⁶ⁿom sa naapêélis nala vu Anutu in ham busin-ande langaah, osin sa kangg oo navu ham hôôk lohakin nalak busin pin. ¹⁷^oSoo monaalahak vu yate Omaaho Bop Yesu Kalisi-te Anutu, sen yate Aamangg omaaho nikaapulis danggakook-ato, nambe biing Vavi Vaambuung naas in bu ka vu ham, osin taato Anutu-te va pin langaah vu ham, tombe mem ham anjak Anutu ni. ¹⁸^pTonde yik sa naalohak having nambe Anutu biing-ambe ham alompayo naatu melangaah, in nambe ham anjak ni naambe ham monatung mem in yi. In teey ham in nambe ham naatu yite hil-ambe ham mando gaving yi vu baandoni, tonde wiingin nambe bu yite va nivasa vasa ngeeyaata lôôt vu yite hil ham.

¹⁹^qTonde yik ham anjak ni gaving naambe Anutu-te niwêêk bopaata lôôt kaluuuh va vaalu pin, tonde navu niwêêk-anja vu yiyy sen yalonggpayo nala timu vu yii-to, ond yik yite niwêêk bopaata ²⁰^rsen wiing-ambe Kalisi kandi lak laah vu hil yimbin-ate be hako be la nando nama vasa having yi vu baandonii-to. ²¹^sTombe tu yêêv bopaata kaluuuh hil bo-bop osin yêêv bop-aso, de hil sen haalend bop-ato, osin hil aniwêêk pin. Keen, kaluuuh va pin sen haalend bop neep gêen-anjo, osin va vaalu sen haalend e naatu bop vu busin taamusin gaving-ato. ²²^tTonde

^j 1:11 Lom 8:28-29 ^k 1:13 Kol 1:4-6; Ep 4:30 ^l 1:14 2Ko 1:22 ^m 1:15 Kol 1:4

ⁿ 1:16 Kol 1:3; 1Tes 1:2 ^o 1:17 Kol 1:9 ^p 1:18 Ep 4:4; Kol 1:12 ^q 1:19 Kol 1:11

^r 1:20 2Ko 13:4; Kol 2:12; Hiblu 1:3 ^s 1:21 Kol 1:16; 2:10 ^t 1:22 Saam 8:6; Mat 28:18; Ep 4:15

Anutu wiing-ambe va pin hulis Kalisi vaalu kambi lung la, de wiing-ambe tu hil bel pin-ate lukook, in yoo tu va pin danggakook. ²³^uDe wiing-ambe hil bel-ate pin latu Kalisi naavi, tonde Kalisi sen yoo nalohvu va pin vu baandoni de vu voon-ato, ond yoo vu yi la osin doos-ambe nando hôôk yite hil alondpayo pin.

**Yana mengg nama, le ma de Anutu wiing Kalisi
laam in nambe yiiy mando metumin**

2 ¹^vBôôy ham navu sapa hôôk mop sen ham ana mem nama valok-atêêto, in ham navu kalêêh Anutu-te tanasin osin ham monawiing va nipaya paya. ²^wIn busin-anju ond ham oo mosapa hôôk mopaatôôv anipaya voon-ate, tonde ham nanyem laas in mamu nipaya-te yêêv sen tu yêêv-ambe nanggin va pin vu voon-anjôôto. Yik mamuu-ja yoo naahen nawiing kul hôôk nanyend doos-aso sen davu kalêêh Anutu lavaa-to londpayo. ³^xBôôy yiiy ahondoos navu sapa hôôk va sen yaningga naavi nipaya voon-ate nawiingin-ato. Yiiy oo navu sapa hôôk va sen yalonggpayo navu navu in-ambe yakangg navu osin yamengg nôôn in-ato, om Anutu ahekalin vu yiiy hil anipaya voon-ate be wiingin nambe kawiiy yiiy na, naambe sen yik ahekalin vu hil anipaya voon-ate pin-ato. ⁴^yLemu Anutu ond omaaho ka pasiv bopaata lôôt, tombe ahe yoo having yiiy pangasen.

⁵Ke, yate va nipaya wiing-ambe yala in nambe yana mengg nama valok-ate, le ma de Anutu wiing-ambe yaatu hil amemoos having Kalisi sen Anutu wiing-ambe kandi lak laah vu hil yimbin-atêêto. Keen, Anutu hako yiiy alaah vu yi lak yoo yite samu samu nyemalis amu. ⁶^zOnd wiing-ambe yiiy kandi lak having Yesu Kalisi, tombe

yik wiing-ambe yiiy ahondoos nando hôôk ti vu baandoni. ⁷^aNawiing nambêênja in nambe hil oo mondANJI vu busin taamusin danggata osin danggata naambe Anutu omaaho samu samu danggakook timu keen lôôt, in nawiing va nivasa vu yiiy-anjo danga lak Yesu Kalisi.

⁸^bKe, ham-ame awiing vati lukalaah in nambe nôôh ham vêêl in va nipaya-te nyevahaan e, nganjo ham alompayo la timu vu Yesu, tombe Anutu yoo wiing samu samu vu ham, om yik lôôh ham vêêl nyemalis amu. ⁹^cDangga me-neep vu va sen ham nawiing-ato in nambe ham oo gako ham haalem jak e. ¹⁰^dNganjo Anutu yoo samu yiiy lohvu ka. Wiing-ambe yaatu Yesu Kalisi-te hil in nambe yaambiing kul anivasa vasa, sen ka vu bôôy vulôôt-ambe nêêl nambe yaambiing-ato.

^u 1:23 Lom 12:5; Kol 1:18; Ep 4:10 ^v 2:1 Kol 1:21; 2:13 ^w 2:2 Kol 3:7; Tit 3:3; Jon 12:31;

Ep 5:6; Ep 6:12 ^x 2:3 Kol 3:6 ^y 2:4-5 Luk 15:24,32; Lom 6:13; Ep 2:1; Sin 15:11

^z 2:6 Kol 2:12 ^a 2:7 Ep 1:7 ^b 2:8 Jon 4:10; Hiblu 6:4 ^c 2:9 1Ko 1:29-31; 2Ti 1:9

^d 2:10 Tit 2:14

Kalisi supin omaahonôôn alu yuuu latu lu timu

¹¹^eOm ham akam-ame jingin bôoy sen ham naahen hil alundoos-ato le, in hil sen sil oo dalaah naavind in taato naambe sil Islel-ato, ond danêîl ham nambe hil sen me-dalaah naavind-ato le. ¹²^fOnd hôök busin-anju ham oo naahen nando diin in Kalisi. Ham hil bamaan, Anutu me-yite hil Islel ham e, tombe vakasin sen Anutu jôoy ak Islel-ato ond me-jôoy ak ham having e, malis. Hil Islel ond sil akand navu va nivasa ti be datung mend in, nganjo ham ond ham-ame natung mem in va nivasa tii-ju le, tonde Anutu keen-ame nando having ham in nambe dôôvu ham e. ¹³^gLemu gêen-anjo ond ham sen ham nando diin bôoy-ato, ond mem ham atu Yesu Kalisi-te hil-ambe ham alaam ngaaho vu Anutu, in Kalisi kaasêeh yite nihees in ham having.

¹⁴^hKalisi ond yate omaaho mamaal danggakook yi, ondeey supin hey Islel having ham hil bamaan alaam, tombe kawiyy yate ahekalin sen tu ayak-ambe yakaluuh yiii-ato la, tonde yaatu hil dangga timu. ¹⁵ⁱIn dangga nambe vasap naavi be yimb, tombe wiing-ambe Mose-te tanasin vaha vaha pin tu va malis. Wiing nambêenjo in nambe hil Islel osin hil vaalu sen sil-ame Islel-ato daatu yite hil moos nôôn timu, tombe mem sil mando osin vakasin melaas. ¹⁶^jKeen, yimb ak haah pako tombe wiing-ambe yiii ahondoos aatu nôôn timu be hako yiii laah vu Anutu, tombe va sen yahengg kalin vu yiii-ato ma la. ¹⁷^kLaam-ambe nêel banye nivasa mamaal-ate, nêel vu ham sen ham nando diin in Anutuu-to, tonde yik nêel vu hey Islel sen hey nando ngaaho vu yiii-to nambe yalonggpayo javuh ti. ¹⁸^lKeen, Yesu tu yate mopaatôôv sen Vavi Vaambuang timu nako yiii lu yuuu nalaam vu Aamangg Anutuu-to.

Yiiy bel-ate aatu Anutu-te dumb keen

¹⁹^mOm gêen ham-ame nando nambe sen hil bamaan yesin laah e, nganjo ham alukalaam having Anutu-te hil-ambe yite taaku tu ham ambaam dangga dosin, tombe yik ham pin atu Anutu-te dangga nôôn timu. ²⁰ⁿHam alohvü bayêen ti Anutu haav, ond valaah hey sinaale-so osin hil vaalu sen danêîl yite vakasin langaah-ato nambe ngaandiin, tombe mem haav bayêen kook ham naale lak ngaandiin hey-anjo. Tonde mem Yesu Kalisi timu yoo tu tatuuh

sen bayêen ahelasu-te danggakook aniwêek-ato. ²¹^oTombe bayêen kook pin neep ak Yesu timu be duuh sil pin lavuh ti be deep tatimasin,

^e 2:11 Ep 5:8 ^f 2:12 Kol 1:21; Lom 9:4; 1Tes 4:13 ^g 2:13 Kol 1:20 ^h 2:14 Ais 9:6;

Kol 2:14; 1Ko 12:13 ⁱ 2:15 2Ko 5:17 ^j 2:16 Kol 1:20,22 ^k 2:17 Sek 9:10;

Ais 57:19 ^l 2:18 Ep 3:12 ^m 2:19 Ep 3:6; Hiblu 12:22-23 ⁿ 2:20 Mat 16:18; 1Ko 3:11

^o 2:21 Ep 4:15-16; Kol 2:19; 1Ko 3:16

tonde Anutu yoo naahen naahaav lôôt in biing-ambe bayêên-anjo naatu bopaata, tombe mem naatu Anutu-te dumb vaambuang. ²²^pAnutu duuh ham having Kalisi, in ham-anja ham atu yite bayêên kook having, tombe haav bayêên lak-ambe tu yite bayêên sen Vavi Vaambuang lukala nando hôök-ato.

**Pol-ate kul nambe naanêîl banye nivasa vu
hil vaalu sen sil-ame Islel-ato**

3 ¹^qOm nambêênja ondeey sa Pol saaluus kalaambus in sen saanêîl Yesu Kalisi-te banye nivasa langaah vu ham sen ham-ame Islel-ato le. ²^rMak ham hangoyin lung la nambe Anutu wiing samu samu osin vu kul vu sa nambe sa naas aambiing yite kul vu ham. ³^sAnutu yoo tatekin vakasin sen neep vunin-ato vu sa tombe sa lak ni, lohvu vakasin boow sen sa kaavu neep munggin-ato. ⁴Om naambe ham naasevin ond ham alohvü nambe ham anjak ni naambe sen soo alak Kalisi-te vakasin sen yoo neep hôök vunin bôôy-ato ni.

⁵Vu bôôy ond Anutu me-tatekin vakasin-anjo vu omaaho ti be lak ni nivasa le, nganjo gêen ond mem Vavi Vaambuang tatekin vu Anutu-te sinaale-so osin hil sen danêîl yite vakasin langaah-ato be lalak ni. ⁶^tYik vakasin-anjo nambe va nivasa vasa sen Anutu navu vu yite hil-ato, ond navu vu ham vaalu sen ham-ame Islel-ato having, tonde ham alukalaam having hey Islel-ambe yiyy pin aatu nôôn timu. Tombe vakasin sen Anutu jôôy bôôy nambe biing vu hey-ato, ond yik nôôn nalak vu

ham having, ond manyinjo yoo lak dangga sen ham awii-having banye nivasa be ham atu Yesu Kalisi-te hil-ato.

⁷^uTonde Anutu wiing samu samu vu sa nyemalis amu lak yoo yite niwêêk, de wiing sa be saatu yite kul vaha in nambe sa naanêîl banye nivasa-jo langaah. ⁸^vSak sa omaaho nipaya, de Anutu-te hil pin ond nind vasa kaluuuh sa, le ma de wiing yite samu samu nôôn-anja lukalaam sa namangg nyemalis amu in nambe sa naanêîl Kalisi-te nôôn anivasa bopaata langaah vu hil vaalu sen sil-ame Islel-ato. ⁹^wTonde sa tatekin Anutu-te vakasin sen neep vunin bôôy-ato danggakook in nambe nanjip langaah vu omaahonôôn pin, in vakasin-anjo yoo vun yi be neep hôök Anutu lopayo vu bôôy sen hatung ngaanggis-ato lôôt-ambe tok laam gêen-anjo. ¹⁰^xAnutu vu kul-anjo vu sa in nambe hil bo-bop baandoni osin hil aniwêêk-aso vu baandoni lanji hil bel-ate, be lanjak ni naambe Anutu omaaho ka bopaata lôôt kaluuuh va pin. ¹¹Yik lohvu vakasin sen Anutu yoo ka vu bôôy nyendoos-ambe neep vulôôt, tombe mem wiing-ambe

^p 2:22 1Pi 2:5 ^q 3:1 Ep 4:1; Pil 1:7,13; Plm 1,9 ^r 3:2 Kol 1:25 ^s 3:3 Ep 1:9-10;
Kol 1:26 ^t 3:6 Ep 2:13,16-19 ^u 3:7 Kol 1:23,25 ^v 3:8 1Ko 15:9-10; Gal 1:16; Ep 1:7
^w 3:9 Lom 16:25; Kol 1:26 ^x 3:10 Lom 11:33; 1Pi 1:12

nôôn ak vu yate Omaaho Bop Yesu Kalisii-to. ¹²^yYalonggpayo la timu vu Yesu be yaatu yite hil om yame naayêen Anutu le, nganjo yiyy naalohak la vu yi, in yalak ni nambe me-le jonin yiyy e. ¹³^zOm sen saawiingin naanêel vu ham naambe ham angge nimeen-anjo tovu sa lak dangga sen sa hako banye nivasa laas vu ham-ato, ond ham-ame naham jak-ambe ham animtambo le, nganjo nimeen sen sa naakuu-jo ond ham naapêelis in.

Pol wiingin nambe hil Epesas lanjak ni naambe Kalisi ahe having sil

¹⁴Ke, vakasin-anjo ondeey sa naalohak lôot vu Aamangg Anutu in ham. ¹⁵In hil baandoni osin hil vu voon pin ond yate danggakook neep vu yi. ¹⁶^aOm sa naalohak vu in nambe va nivasa nikaapulis keen-ato neep vu yi, om yik biing Vavi Vaambuung naas vu ham in bu niwêek dukana ham alompayo be ham baale niwêek. ¹⁷^bTonde sa naalohak having in nambe ham alompayo na timu vu Kalisi, tombe mem yoo le mando hôök ham alompayo, in ham anjak ni naambe Anutu ahe naving ham, om ham oo baale niwêek hôök ahe havingin alompayo naambe sen haah kangga nalukala ngaanggis-ambe naale niwêek-ato. ¹⁸^cTombe mem ham gaving Anutu-te hil pin-ambe ham anjak ni naambe Kalisi ahe yoo naving yiyy bopaata lôot kaluuu va pin, de me-doosin yiyy osin me-nimbaya in yiyy e. ¹⁹^dKe, Kalisi-te ahe havingin-anja bopaata lôot, om yiyy omaahonôôn-ame aalohvu nambe yanjak ni vanuh e, om ham anjak ahe havingin-anju ni le mem Anutu yoo le bu yi naas osin doos-ambe mando hôök ham alompayo lôot.

²⁰^eAnutu-te niwêek nawiing kul hôök yalonggpayo, ond lak yite niwêek-anjo Anutu yoo lohvu nambe biing kul bopaata lôot savok va sen yiyy akangg navu be yiyy navu kataangg-ato. ²¹Om nambêenja yiyy bel-ate gaving Yesu Kalisi be yiyy gako Anutu haale jak nohvu busin pin-ambe nanjip danggata osin danggata. Keen.

Yiyy bel-ate aatu Kalisi-te nôôn

4 ¹^fSak saaluus kalaambus in Omaaho Bop-ate omaaho sa, om sa naanêel vu ham naambe Anutu teey ham om ham oo ambiing va nivasa nohvu sen ka navu nambe yite hil lambiing-ato. ²^gHam daanggôôl ham-ambe ham oo naalum melaas. Ham-ame ambu dôök nyevahaan sen hil vaalu dawiing ham payaa-to le, nganjo ham ahem oo gaving sil-ambe ham naapuvu ham niwêek. ³^hVavi Vaambuung wiing-ambe ham alompayo lavuh ti, om ham aniwêek-ambe ham ganggin ham in nambe

^y 3:12 Jon 14:6; Lom 5:2; Hiblu 4:16 ^z 3:13 Kol 1:24 ^a 3:16 Kol 1:11 ^b 3:17 Jon 14:23;

Kol 1:23; 2:7 ^c 3:18 Kol 2:2 ^d 3:19 Kol 2:10 ^e 3:20 Kol 1:29 ^f 4:1 Ep 3:1; Kol 1:10

^g 4:2 Kol 3:12-13 ^h 4:3 Kol 3:14-15

ham oo mando osin ham alompayo javuh ti naambêenja jak busin pin. Yik ham oo mando osin vakasin melaas sen duuh ham-ambe ham atu nôôn timuu-to. ⁴ⁱIn yik yaatu nôôn timu de Vavi Vaambuung nôôn timu nando, tonde Anutu teey ham in nambe ham monggatung mem in yite nôôn timu. ⁵^jKeen, yik yate Omaaho Bop timu nando, tonde yik yaawii-having neep ti be yaalipis bel neep timu. ⁶^kTonde yik yate Anutu timu nando, yiyy pin Aamangg yi be yoo nanggin yiyy pin, de nawiing-ambe yiyy pin naawiing yite kul, tonde nando hôök yiyy pin alonggpayo.

⁷^lKalisi yoo vu yite niwêek kul-ate ti ti vu yiyy pin, tombe yiyy hako nyemalis amu lohvu sen Kalisi ka navuu-to. ⁸^mTombe yik lohvu sen Anutu-te vakasin neep hôök kaapiyaa-to nambe,

“Savok Saalang-aso be duuh sil nambe sen kalaambus-ato, de mem lakalaah baandoni be hatiyy niwêek kul-ate helak omaahonôôn nyemalis amu.”

⁹ⁿVakasin sen nêel nambe lakalaah baandonii-to, ond dangga nambe lukalaam ngaanggis sen neep kambinii-jo munggin. ¹⁰Om omaaho sen lukalaam-ato ond yik yi sen lakalaah baandoni be kaluuuh la lôôt, in nambe yoo nohvu taaku baandoni be kambini pin osin doos. ¹¹^oTombe vu niwêek kul-ate vu yite hil vaalu be latu sinaale bop-aso, de vu vaalu be latu hil sen danêel Anutu-te vakasin langaah-ato, tonde wiing vaalu be latu sinaale be lako banye nivasa la lohvu taaku pin, tonde wiing vaalu be latu ngaasaaking osin kaputung. ¹²^pNatiyy yite niwêek kul-ate nahelak hil nambêenjo in nambe samu Anutu-te hil pin-ambe sil lambiing yite kul, tombe mem hil ngeeyaata daatu Kalisi-te hil nôôn timu be niwêek jak. ¹³^qKul-anjo yoo le na lôôt-ambe yiyy pin aambiing gaving vakasin nanjip ti be yiyy pin anjak Anutu Noow ani, tombe mem yiyy naatu hil aniwêek-ambe nivasa nôôn naambe Kalisi sen Omaaho Bop osin omaaho niwêek yi be yoo nivasa vulôôt-ato. ¹⁴^rOm yiyy mando osin yakangg bu va nivasa. Le naambe nama ond omaahonôôn-ate vakasin tatuhin vaha vaha sen kand navu be danêel-ato le gakoseey yakangg naah-ande nom, naambe sen vavi nayêyak haah nama osin lis nalaah-ande nalom-ato, in hil-anju davu tatuhin hil vaalu be dako sil la mop paya. ¹⁵^sLemu yiyy ond yahengg gaving hil-ambe yiyy naanêel vakasin nôôn amu, tombe mem yale naatu hil anivasa nôôn naambe Kalisi sen tu yate lukook-ato. ¹⁶^tYik Kalisis-ja yoo nasupin yiyy pin lavuh ti be yaatu nôôn timu, nambe sen hanyum omaaho ti naavi boow ti ti lalukalaah sil-ambe latu naavi doos timuu-to, de nikangga ti ti pin napuvu ninaavi tatin-ambe nando osin doos, tombe naavi boow ti ti pin dawiiing silate kul lohvu be mem ahend naving sil, om sil naavind doos-ato natu bopaata be niwêek nalak.

ⁱ 4:4 Lom 12:5; Ep 2:16,18 ^j 4:5 Jon 10:16 ^k 4:6 1Ko 12:6 ^l 4:7 Lom 12:3,6

^m 4:8 Saam 68:18; Kol 2:15 ⁿ 4:9 Jon 3:13 ^o 4:11 1Ko 12:28 ^p 4:12 2Ti 3:17

^q 4:13 Kol 1:28 ^r 4:14 1Ko 14:20 ^s 4:15 Ep 1:22; 5:23; Kol 1:18 ^t 4:16 Kol 2:19

Hil bel-ate sapa hôôk mopaatôôv moos

¹⁷^uSa naanêêl niwêêk vu ham lak Omaaho Bop haale naambe hamame ambiing va danje-danjeen naambe hil vaalu sen sil doosin Anutu be dawiing-ato le, in sil ond yoo kand navu va mali-malis amu. ¹⁸^vIn hil-anja ond dando hôôk mekanu, om sil-ame lalohvu nambe sahi vakasin-ambe lanjak dangga ni le. Anutu wiingin nambe biing-ambe sil mando metumin, le ma de yoo dando diin lôôt, in sil alondpayo nitambo in Anutu de me-lalak

ni le, ¹⁹^wom londpayo niwêêk ak-ambe me-nind namum daka le, malis, tonde sil davu sil la osin doos-ambe dawiing baayamb ayuuah ame lôôt, tonde sil oo mend nôôn in mondambiing va nipaya vaha vaha pin.

²⁰Lemu Kalisi me-taahu ham hôôk va nambêênu le, malis. ²¹Ham hango Kalisi-te vakasin, in vakasin nôôn keen sen hey taahu ham hôôk-ato ond neep vu Yesu. ²²^xOm ham gavuuh ham alompayo nipayaa-to na, in wiing-ambe ham navu sapa hôôk va nipaya bôôy-ato, tombe va nipaya sen tatuhiham ambe ham alompayo navu navu in-ambe ham nawiing-ato, ond nawiing-ambe ham alompayo nipaya nalak lôôt. ²³^yOm ham alompayo moos jak-ambe ham akam bu va nivasa mu. ²⁴^zYik ham naatu hil moos in Anutu yoo navu samu hil moos-anja nambe yi be davu sapa hôôk vakasin keen, om sil hil anivalok osin vaambuung.

²⁵^aIn yaatu hil nôôn timu om ham gavuuh vakasin lakalu osin vakasin tatuhiham pin na, de ham pin naanêêl vakasin nôôn keen amu vu ham.

²⁶^bDe naambe ham ahem kalin vu ham ond ham ganggin ham, in nipaya le nanjip vu ham, om ham ahem naakuuh-ambe ham samu ham pavis, de me-nanjip vandiisinaandiin-ambe taaku naambus na le, ²⁷in ham e tatekin mopaatôôv vu omaaho nipaya Saalang-ato. ²⁸^cTonde omaaho sen hôôndak ambuu-to, ond me-gôôndak vati jesin naah e, nganjo yoo salo kul anivasa ti be biing in gako mone daka be dôôvu hil sen dativak in va yuuah amêê-to. ²⁹^dTonde vakasin anipaya paya pin ond ham-ame naanêêl ti le, nganjo ham naanêêl vakasin anivasa mu in dôôvu hil sen dangôô-to be samu sil. ³⁰^eAnutu-te Vavi Vaambuung lukala nando hôôk ham alompayo in nambe taato be ham anjak ni naambe yaatu Anutu-te hil, om le nôôh yiyy vêêl in va nipaya be yanaah mando gaving yi, om ham-ame ambiing-ambe Vavi Vaambuung alopayo nimeen jak e. ³¹^fVa sen ham alompayo nikalin-ato osin ham alompayo navaav nambe kin, de ham ahem kalin, tonde ham nawiing paang osin vakasin palesin-ato,

^u 4:17 1Pi 1:14; Lom 1:21 ^v 4:18 Ep 2:12 ^w 4:19 Kol 3:5 ^x 4:22 Lom 8:13; Kol 3:9

^y 4:23 Lom 12:2 ^z 4:24 Jen 1:26; Kol 3:10 ^a 4:25 Kol 3:8-9; Sek 8:16 ^b 4:26 Saam 4:4; Jem 1:19-20 ^c 4:28 1Tes 4:11 ^d 4:29 Ep 5:4; Kol 3:8; 4:6 ^e 4:30 Ais 63:10; 1Tes 5:19; Ep 1:13-14 ^f 4:31 Kol 3:8

ond ham gavuu na valok-ate gaving va nipaya vaalu pin. ³²^sTonde ham oo kam pasiv in mango-so be ham samu sil nivasa, de ham akam-ame bu va nipaya sen omaaho ango dawiing vu ham-ato le, nganjo ham kawiiy nipayaa-ju na naambe sen Anutu ka navu Kalisi be navu kawiiy hamate nipaya nalaa-to.

Yiyy sapa hôök va melangaah-ate

5 ¹^hAnutu ahe having ham-ambe ham atu yite noow-aso, om ham oo sapa hôök vaha be ham ambiing nohvu sen nawiing-ato. ²ⁱTombe yik ham oo monambiling va osin ham ahem gaving omaahonôôn pin, naambe sen Kalisi ahe having yiyy pin-ambe lukalaah yahenggban-ambe yimb, tombe tu salivangin anivasa be galovasa la vu Anutu.

³^jTonde baayamb osin va nipaya vaha vaha pin sen yiyy naavun yiyy in-ato de menôôn, ond vakasin-anjo me-lohvus nambe ham sen ham atu Anutu-te hil-ato, ond ham-ame bakaas in daka le. ⁴^kDe ham-ame naanêêl vakasin navu dees osin ham-ame naanêêl vakasin nindanje-danjeen e, tonde ham-ame ambiing kangasin vu omaaho ango mali-malis e, in va nambêênya me-lohvus le, nganjo ham naapêêlis na vu Anutu osin ham alompayo nivasa ond mem nivasa. ⁵^lIn ham oo alak ni lung la nambe omaaho baayamb, de omaaho sen nawiing va nipaya vaha vaha kaatokin-ato, tonde omaaho sen nawiing menôôn-ato, in hil amend nôôn ond kand navu va vu voon natu silate anutu, om hil pin-anja me-lalohvu nambe landukana gaving Kalisi yuuuh Anutu-te hil e. ⁶^mOm ham-ame gambe nanyem in hil sen dawiingin nambe tatuhiham lak vakasin mali-malis in nambe ham ambiing va nipayaa-to le, in Anutu-te ahekalin e naatovu hil sen davu kalêêh lava be dawiing va danjeen nambêênjô-to be sil gako nipaya nyevahaan, ⁷^oom ham-ame andukana gaving sil e. ⁸ⁿIn bôôy ond ham nando hôök mekanu, lemu gêen ond Omaaho Bop wiing-ambe ham nando hôök melangaah, om ham ambiing va pin nohvu sen ham atu hil amelangaah-atêêto. ⁹In hil sen dando hôök melangaah-ato ond dawiing va nivasa mu, osin dawiing va nivalok-ambe davu sapa hôök vakasin keen. ¹⁰^oOm ham sahi va pin-ambe ham amem sapa va vaalu sen Omaaho Bop nayi nivasaa-to, ¹¹^pde ham-ame andukana gaving hil sen dando hôök mekanuu-to be ham-ame ambiing va sen nôôn maa-to gaving sil e, nganjo ham taato langaah naambe va nambêênya ond nipaya. ¹²In va sen dawiing kaatokin-ato ond yame bakaas in e, in yaningga e naamum in. ¹³^qNganjo va pin sen taato yi laam langaah-ato ond mem hil pin dayi neep langaah-

^s 4:32 Mat 6:14; 18:22-35; Kol 3:12-13 ^h 5:1 Mat 5:48 ⁱ 5:2 Lom 14:15; Gal 2:20;

Hiblu 10:10; Eks 29:18 ^j 5:3 Kol 3:5 ^k 5:4 Ep 4:29 ^l 5:5 1Ko 6:9-10; Kol 3:5

^m 5:6 Kol 2:4,8; Lom 1:18 ⁿ 5:8 Ep 2:11,13; Kol 1:13; 1Pi 2:9; Jon 12:36 ^o 5:10 Lom 12:2

^p 5:11 2Jon 10-11 ^q 5:13 Jon 3:20-21

ambe dalak ni, in va pin sen taato yi laam langaaah-ato ond natu va melangaah-ate. ¹⁴^rLohvu Anutu-te vakasin neep hôök kaapiya nambe,

“Hong sen onahop-ato, okandi jak. Onggavuuh mop meyimbin-ate na, le mem Kalisi-te melangaah e naatum ak hong.”

¹⁵Om ham oo ganggin ham nivasa, de ham-ame ambiing va danjeen naambe hil sen kand maa-to le, nganjo ham ambiing va naambe hil osin kand. ¹⁶^sHam-ame basap busin ti na malis e, nganjo ham oo niwêêk-ambe ham ambiing kul jak busin pin, in busin sen yiyy nando gêen-anjo nipaya.

¹⁷^tOm ham-ame ambiing va naambe hil sen kand ma dawiing-ato le, nganjo ham akam bu be ham anjak va sen Omaaho Bop ahe naving-ato ni. ¹⁸^uDe ham-ame naanum lôôt-ambe ham alumkook biing paya le, in vaa-ja le biing-ambe ham anipaya jak, nganjo Vavi Vaambuung dukana ham alompayo lôôt-ambe dôôvu ham ond mem nivasa. ¹⁹^vHam ambiing Anutu-te taalôôt osin laalo de ham ambiing laalo sen Vavi Vaambuung taato vu ham-ato, tonde ham ambiing laalo hôök ham alompayo osin ham akam vasa vu Omaaho Bop. ²⁰^wTonde ham naapêélis na vu Anutu osin ham alompayo nivasa jak busin pin in va pin sen natovu ham-ato. Ham naapêélis na vu Aamangg Anutu jak yate Omaaho Bop Yesu Kalisi haale.

Vakasin lak moow ayuuuh vêêh dako sil-ato

²¹^xHam gako Kalisi lak-ambe ham anggulis halim-aso baambund.

²²^yDe ham vêêh-aso, ham anggulis layamaso baambund naambe sen ham nahulis Omaaho Bop baambuu-to. ²³^zIn ham layam-aso latu hamate danggakook-ambe danggin ham, nambe sen Kalisi tu hil bel-ate dangga be nako yite hil-anju laah vu Anutuu-to. ²⁴Hil bel-ate nanyend vuun vu Kalisi, om yik vêêh-aso yoo nanyend vuun vu layêêndin in va pin.

²⁵^aTonde ham moow, ond ham ahem gaving vanem-aso naambe sen Kalisi ahe having hil bel-ate be yoo vu yi la osin doos-ambe yimb in sil-ato, ²⁶^bond yimb in nambe biing-ambe sil daatu Anutu timu yoote va, om yoo lipis sil ak bel osin nanêêl Anutu-te vakasin vu sil-ambe nind vasa lak. ²⁷^cWiing in nambe daatu yite hil bel-ate osin nind kaapiikaanôon keen jak, de va nipaya osin va ningook ayuuuh ame me-nanjip vu sil e, tombe mem le biing-ambe daatu yite va vaambuung, de va nipaya nama na valok-ate lôôt in sil.

²⁸Om ham moow, ham ahem oo gaving vanem-aso naambêênja naambe sen ham ahem oo naving ham naavim-ato, in omaaho sen ahe naving vanêê-to ond

^r 5:14 Ais 26:19; 60:1; Lom 13:11 ^s 5:16 Kol 4:5 ^t 5:17 Lom 12:2; Kol 1:9

^u 5:18 Luk 21:34 ^v 5:19 Kol 3:16; Saam 33:2-3 ^w 5:20 Kol 3:17 ^x 5:21 1Pi 5:5

^y 5:22 Jen 3:16; Kol 3:18; 1Pi 3:1 ^z 5:23 1Ko 11:3; Ep 1:22 ^a 5:25 Kol 3:19; 1Pi 3:7; Gal 1:4 ^b 5:26 Tit 3:5; Hiblu 10:10 ^c 5:27 2Ko 11:2; Kol 1:22

ahe yoo naving yi. ²⁹In omaaho ti me-yoo nimbaya
in ningaavi le, nganjo yoo navaat osin yoo monanggin ningaavi nivasa
lôôt nambe sen Kalisi nanggin hil bel-atêêto. ³⁰^dKalisi nanggin yiyy
nivasa in Kalisi naavi yiyy, de yiyy pin aatu yite naavi boow ti ti pin.
³¹^eLohvu

Anutu-te vakasin neep hôôk kaapiyaa-to nambe,
“Om nambêenja moow e gavuu mangganaan ayuu tangganaan
na de jalak ak vane be yuuu daatu nôôn timu.” ³²^fOnd danggakook
bopaata vun yi hôôk vakasin-anjo, ondeey sa naanêêl ak Kalisi having
yite hil bel-ate. ³³Tombe yik vakasin-anjo lak ham having nambe ham
moow ti ti pin lôôt, ham ahem oo gaving vanem-aso naambe sen ham ti
ti yoo ahe naving yi-to, tonde ham vêêh, ond ham oo gako layam-aso
jak.

Vakasin lak unoopasiv osin maandin ayuuu taandin

6 ¹^gHam unoopasiv, ham atu Omaaho Bop-ate hil, om ham oo
nanyem laas vu mom-aso tam-aso ond mem lohvu. ²^hIn Anutu-te
tanasin bopaata ti neep, ond Anutu jôôy vakasin samu samu lak having
nambe, “Onggako mom ayuuu tam jak ³le mem gale mando nivasa be
omando metumin ahusaandi vu voon.”

⁴ⁱTonde ham himbop, ham-ame ambiing-ambe noom-aso ahend
kalin vu ham e, nganjo ham ganggin sil nivasa be ham taahu sil hôôk
Omaaho Bop-ate tanasin.

Vakasin lak hil sen latu omaaho ango-te va kul- ate malis amuu-to osin silate yêêv

⁵^jHam sen ham atu omaaho ango-te va kul-ate malis amuu-to, ham oo
anjêenin hamate yêêv-aso sen danggin ham-ato be ham nanyem laas in
sil lavand osin ham alompayo timu, yik naambe sen ham nanyem laas
vu Kalisii-to. ⁶De ham-ame ambiing kul ak sil amend amu in nambe sil
akand vasa vu ham e, nganjo ham ambiing kul vu sil nivasa, in ham
atu Kalisi-te hil kul-ate, om ham ambiing va nohvu Anutu ka osin ham
alompayo timu. ⁷De ham-ame ambiing kul in nambe omaahonôôn lanji
ham nivasa le, nganjo ham akam vasa be ham oo ambiing kul aniwêek
in Anutu ji ham nivasa. ⁸^kIn ham oo nalak ni nambe omaaho ti biing kul
anivasa ond Anutu le bu nivasa nyevahaan dukanaah, vu ham sen ham
atu omaaho ango-te va kul-ate malis amuu-to, de vu ham sen ham atu
yêêv-ato gaving.

^d 5:30 1Ko 6:15; Ep 1:22-23 ^e 5:31 Jen 2:24; Mat 19:5 ^f 5:32 Taato 19:7 ^g 6:1 Kol 3:20

^h 6:2 Eks 20:12; Mat 15:4 ⁱ 6:4 Kol 3:21; Diu 6:7,20-25; Saam 78:4; Pro 22:6

^j 6:5 Kol 3:22-23; Tit 2:9-10; 1Pi 2:18 ^k 6:8 2Ko 5:10; Kol 3:24-25

⁹^tTonde ham sen ham atu yêvê-atô ond ham oo ganggin hil sen latu hamate va kul-ate malis amuu-jaato nivasa gaving, de ham-ame ambiing paang ak sil jesin naah e, in hamate Omaaho Bop timu nando baandoni be nanggin ham osin hil sen latu hamate va kul-ate malis amuu-jaato pin, de me-nayi yiii nambe haale bop-ande haale pasiv e.

Hil bel-ate baale niwêêk naambe hil ngaamong-aso

¹⁰^mKe, om sa naanêêl vakasin ahus-anjo vu ham naambe ham atu Omaaho Bop-ate hil om ham gako niwêêk vu yi be ham naatu yite hil aniwêêk. ¹¹ⁿHam anjop Anutu-te dayongg osin va sen gilin ngaamong-ato pin dukana ham in ham oo baale niwêêk, de mamu nipaya Saalang sen nawiingin nambe taanyukin ham-ato ond me-kape ham e. ¹²^oIn yame naayiis ngaamong vu omaahonôôn e, nganjo yiii naayiis ngaamong vu yêvê anipaya osin va niwêêk sen danggin va mekanuu-to, de vu mamu nipaya sen danggin taaku voon-anjôôto. ¹³Om ham anjop Anutu-te dayongg osin va sen gilin ngaamong-ato pin dukana ham, in naambe busin anipaya naatovu ham ond ham oo baale niwêêk-ambe ham anyiis ngaamong lôôt-ambe jung na, de yik ham oo baale niwêêk lôôt.

¹⁴^pKe, ham oo baale niwêêk-ambe ham gavêêh vakasin keen biiy ham banjum naambe let-ato, tonde ham ambiing va nivalok amu in naatu hamate lolop aniwêêk in gilin ham baambum. ¹⁵^qTonde ham gatung banye nivasa sen nawiing-ambe yalonggpayo melaas nalak-ato dukana ham vaham naambe suul in gilin ham vaham-ambe ham baale niwêêk. ¹⁶Tonde ham alompayo na timu vu Yesu nohvu busin pin naatu hamate dayongg-ambe gilin ham, in omaaho nipaya Saalang-ate laang navu pin sen natum-ambe nandiihin nambe kin dalaan-ato naam ond naasiihin ak-ambe naakuuh. ¹⁷^rTonde ham oo kam bu sen Kalisi hako ham laah vu Anutuu-to naatu hamate taambuuuh aniwêêk in gilin ham alum in ngaamong, de ham gako Anutu-te vakasin keen-ato pin in Vavi Vaambuang e biing-ambe naatu hamate yipak nalu gunjin in ham anyiis ngaamong ak. ¹⁸^sTonde jak busin pin ond ham anohak jak Omaaho Bop-ate niwêêk osin ham kataangg Anutu hôôk lohakin de ham-ame nitambo jak e, nganjo ham amem oo naatum-ambe ham pasam kataangg Anutu in yite hil pin. ¹⁹^tTonde yik ham anohak in sa gaving, in naambe sa bakaas ond Anutu yoo biing vakasin vu sa be sa naanêêl banye nivasa sen neep vunin böôy-ato naam langaah, de same aanjêenin hil e. ²⁰^uSaatu banye nivasa-te omaaho sen sa naanêêl yi langaah-ato ti, ondeey hil landuuh

¹ **6:9** Kol 4:1; Lom 2:11 ^m **6:10** 1Ko 16:13 ⁿ **6:11** Lom 13:12; 2Ko 10:4; Ep 4:14

^o **6:12** Jon 14:30; 1Pi 5:8-9 ^p **6:14** Ais 11:5; 59:17; 1Tes 5:8 ^q **6:15** Ais 40:9; Lom 10:15

^r **6:17** 1Tes 5:8; Ais 49:2; Hiblu 4:12 ^s **6:18** Luk 18:1; Kol 4:2; 1Tes 5:17 ^t **6:19** Sin 4:29; Kol 4:3-4; 2Tes 3:1 ^u **6:20** 2Ko 5:20; Plm 9

sa be sa laam nando hôôk kalaambus-anjo. Om ham anohak naambe same aanjêenin omaahonôôn-ambe sa gavuuh kul-anjo na le, nganjo soo naanêêl langaah nohvu sen Anutu vu kul vu saa-to.

Vakasin ahus

²¹ ^vKe, yiyy halingg Tikikas sen sahengg having yi be nahôôvu sa nivasa in Omaaho Bop-ate kul-ato, ond hako kaapiyaa-ja be laas vu ham, om yoo le gatulin va pin sen natovu saa-to, osin kul sen sa naawiing-ato vu ham-ambe mem ham oo le anjak ni. ²² Ondeey saawiing-ambe laas vu ham in nambe naanêêl hey banyengg vu ham, in biing-ambe ham alompayo nivasa jak.

²³ Yik vakasin lung laa-ja. Heyate halingg-aso ham, om Aamangg Anutu yuuuh Omaaho Bop Yesu Kalisi lambiing-ambe ham pin ham alompayo nanjip melaas, tonde ham ahem gaving osin ham ambiing gaving yi niwêêk. ²⁴ ^wTonde yuuuh lambiing samu samu vu ham pin sen ham ahem naving yate Omaaho Bop Yesu Kalisi lôôt-ato.

^v 6:21 Sin 20:4; Kol 4:7-8; 2Ti 4:12 ^w 6:24 1Pi 1:8